



Nuuk 24. oktober 2018

UKA2018/48

Jens Napâtôk, Partii Naleraq

**1. juli 2019-miit atuutilersumik inatsisinut nalunaarutit atuutsinneqalernissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Peter Olsen, Inuit Ataqtigiit)

Inatsisartuni ilaasortap Peter Olsen, Inuit Ataqtigiit Inatsisartut aalajangiiffigisassaattut siunnersuutinnut qujanaq, inuiaqtigiit inatsisikkut illersugaanerat piinnarnagu ajornangitsinnerusumik inatsisit atorsinnaaneri naassaarisinneri pisariillisarneri Partii Naleqqamiit siunnersuummut imatut oqaaseqaateqassaagut.

Inatsisit pisortanut, qullersanut akiliisinnaasunut aammalu inuiaqtigiinni pisinnaasuinnuinaq atuuttussanngorlugit sanaajunngillat.

Inatsisit tassaapput nunap inuisa sukkulluunnit inuunermi toqqammavigalugit malitassaat aammalu innuttaasut arlaatigut ajortumik pineqarsorigunik inatsit misissorsinnaasariaqarpaat ajornanginnerusumik inatsisilerituumik atueqqaanngikkaluarlutik.

Innuttaasutut arlaatigulluunniit inatsisinik pissarsissagutta imallunniit Inatsisartuni sulinitinni inatsisit pissarsiarissagutsigit, suliffeqarfinniissaguttaluunnit pissarsiarissagutsigit ajornanginnerusumik inatsisit pissarsiariuminartuunissaat pingaaruteqarpoq, taamatullu inatsisip suup atuunna ilanngullugu ersarissuunissaat minnerunngitsumillu paasiuminartuunissaat pingaaruteqarluinnartuupput.

Inatsisit inatsisinik atortitsisunuinnaangitsoq aammalu Inatsisartunuinnaangitsoq tamanut tassalu innuttaasunut kikkunnut tamanut inatsisit paasiuminartuullutillu pissarsiariuminartuussariaqarneri pingaaruteqarluinnartuusoq Partii Naleqqamiit isumaqarpugut.

Tassa naatumik oqaatigalugu pingaarueqarluinnarpoq inatsisit inatsisinut nalunaarutinngorlugit kikkunnut tamanut pissarsiariuminartunngorlugit pisortatigoortumik eqikkarneqarnissaat pingaaruteqarluinnarpoq.

Inatsisit maani nunami atorlugit illersugaasugut aammalu atuisussaataanerput aallaavigalu innuttaasup kialluunniit inatsit sunaluunniit ajornanginnerusumik pisariinnerusumillu takusinnaasariaqarpaa maani nunami inatsit suna atuunnersoq.

Inatsisit ataasiaannangitsumik allannguuteqarfiusimasut amerlasuutillugit paasiuminaallisarneri qulakkeernqarsinnaavoq ajornanginnerusumik nalunaarutinngorlugit pissarsiariuminartunngorlugit pisortatigoortumik eqikkarneratigut, tamannalu maannakkut qallunaatut oqaaseqartunut periarfissaqareersoq nalunngilarput.

Tassalu akiliilluni nittartakkut katitiganngorlugit suliarineqareersimasut namminersortut suliffiutilinnit pisiarineqarsinnaallutik.



partii naleraq

Taamaamat tamanna ilaatigut toqqammavigalugu assorujussuaq Partii Naleqqamiit pakatsissutigaput Naalakkersuisut siunnersuut soqutiginarluinnartoq itigartinneqarnissaa innersuussutigimmassuk.

Naalakkersuisut toqqammavilersuutigaat nalunaaruteqalernissaq pisariungaatsiartussaasoq aammalu ingerlatsinissaq aallartitsinnagu pisariaqartinneqartut eqqarsaatersuutigineqaqqaartariaqartut.

Naalakkersuisut ilanngullugu oqaatigaat siusinnerusukkut eqqarsaatigineqarsimagaluartoq inatsisinut nalunaarutitik atuutitsilernissaq, tamannalu aallartinneqarsimangitsoq sulisunik amigaaateqarneq pissutigalugu.

Kalaallit oqaasii Kalaallit Nunatsinni pingaarnersaallutik inatsisitigut inissinneqarnikuupput, taava soq nunatta inatsisai nunap inuinit sulinermullu atorneqartussat qulakkeerlugit kalaallisut nunap inuinit atorneqarsinnaangorlugit pissarsiariuminartunngorlugit pisortatigoortumik eqikkarneqarnissaat pingaaruteqarluinnartoq sulisussarsiorlugu qangali aaqqinneqarsimangila?

Tamanna Partii Naleqqamiit eqqarsarnartoqartiinnarnagu akuersarneqarsinnaangilluinnaqqis-saartoq isumaqarpugut.

Aasaq manna Kalaallit nunarput qimangikkaluarlugu ilisimatusarfimmi inatsilerituunngorniarsinnaangorput, tamannalu tulluusimaarutissaavoq, tassa pisortat inatsisaat aallavigalugit inatsilerinermermi bachelorinngorniarneq inatsisitigut tamatigoortumik ilinniarfiusinnaalerluni.

Nunap inui maanngaaniit sullissinitsinni aallaaviusariaqarluinnartut Partii Naleqqamiit isumaqarpugut aammalu Kalaallit oqaasiisa salliutinneqarnissaat inatsisikkut illersugaanerani toqqammavigalugit ingerlatsinerput naqissusertariaqarluinnartoq.

Taamatut oqaaseqarluta toqqammavilersorlutaalu siunnersuuteqartup siunnersuutaa tamakkiisumik tapersorlugu Partii Naleqqamiit oqaaseqarpugut atatsiimiitaliamilu susassaqartumi suliarineqarnissaa innersuussutigalutigu.